

## গৌড়ীয় বৈষ্ণব ধর্ম-দর্শন ও রাধাকৃষ্ণতত্ত্বের মূলকথা

এক

বঙ্গে বৈষ্ণব ধর্মের অস্তিত্ব ও প্রচলন বহু প্রাচীন কাল থেকেই। খ্রীষ্টীয় চতুর্থ শতাব্দী থেকে পঞ্চদশ শতাব্দীর মধ্যভাগ পর্যন্ত কালসীমায় উৎকীর্ণ বহু (পয়ত্রিশটি) প্রত্নলেখতে বৈষ্ণবীয় অনুষ্ণ লক্ষ্যগোচর। ঐ সকল প্রত্নতাত্ত্বিক তথ্য প্রমাণ থেকে পণ্ডিতগণ সিদ্ধান্ত করেছেন যে, খ্রীষ্টীয় চতুর্থ শতাব্দী থেকে ত্রয়োদশ শতাব্দী পর্যন্ত বিস্তৃত কালসীমায় রাঢ়বঙ্গে বৈষ্ণবধর্ম ব্রাহ্মণ্য হিন্দুধর্মের বৃহৎ ঐতিহ্যেরই এক বিশেষ মাত্রা হিসেবে বিদ্যমান ও প্রচলিত ছিল। ঔপনিবেশিক ব্রাহ্মণেরাই রাঢ়বঙ্গে লোকধর্মের ক্ষেত্রে বৈষ্ণব উপাসনাকে ক্রমশ প্রসারিত করেছিলেন। বঙ্গে পঞ্চোপাসনার (বিষ্ণু, শিব, শক্তি, সূর্য ও গনেশ— এই পঞ্চদেবতার উপাসনা) শাস্ত্রীয় ঐতিহ্যে বৈষ্ণবধর্মের একটি বিশেষ স্থান ছিল। তবে, প্রাচীন ও আদি মধ্যকালীন বঙ্গে বৈষ্ণবতা কিছু পরিমাণে জনপ্রিয় হলেও শ্রীকৃষ্ণের পূজা তেমন ব্যাপক ভাবে প্রচলিত ছিল না। আমাদের প্রাচীন মহাকাব্য মহাভারতে শ্রীকৃষ্ণ একটি প্রধান চরিত্র। কিন্তু কৃষ্ণ-প্রণয়িনী রাধার প্রথম উল্লেখ পাওয়া যায় কবি হাল-সংকলিত প্রাকৃত গাথাত্রে। এ প্রসঙ্গে শ্রদ্ধেয় ড. শশিভূষণ দাশগুপ্তের মন্তব্য স্মরণীয়—“রাধা সম্বন্ধে আমাদের নিকট যাহা কিছু প্রাচীন তথ্য রহিয়াছে তাহাতে মনে হয় সাহিত্যকে অবলম্বন করিয়াই রাধার আবির্ভাব ও ক্রমপ্রসার; সাহিত্যাদি হইতে উজ্জ্বল রসের মাধ্যমে রাধার ধর্মমতের ভিতরে প্রবেশ।” বঙ্গে সেন রাজাদের শাসনকালে বৈষ্ণবধর্মের বিস্তৃতি বিশেষভাবে লক্ষ্য করা যায়। রাজা লক্ষণ সেনের অন্যতম সভাকবি জয়দেবের ‘গীতগোবিন্দ’ এ-প্রসঙ্গে স্মরণীয়। আদিরসের প্রাধান্য সত্ত্বেও পরবর্তীকালের ভক্ত-বৈষ্ণবেরা জয়দেবের ‘গীতগোবিন্দ’কে ভক্তিগ্রন্থ হিসেবেই শ্রদ্ধা করেছেন। খ্রীষ্টীয় পঞ্চম থেকে পঞ্চদশ শতাব্দীর মধ্যে অনেকগুলি বৈষ্ণব উপপুরাণ রচিত হয়েছিল। (যেমন, আদিপুরাণ, কঙ্কিপুраण, নরসিংহপুরাণ, শাস্ত্রপুরাণ, বৃহদ্ধর্মপুরাণ প্রভৃতি)। এগুলির রচয়িতাগণ বৈষ্ণবধর্মের সঙ্গে পঞ্চোপাসনার ঐতিহ্যকে সমন্বিত করার প্রয়াসী হয়েছিলেন। দ্বাদশ শতাব্দী থেকে চৈতন্যবির্ভাবের পূর্ব পর্যন্ত বঙ্গে তথা পূর্ব ভারতে বৈষ্ণব ধর্মের ইতিহাসের মূল উৎস হ’ল সমকালীন সাহিত্য। এ-প্রসঙ্গে মৈথিলি কবি বিদ্যাপতি ও বঙ্গীয় কবি চণ্ডীদাসের নামও বিশেষভাবে স্মরণীয়। বস্তুত রাধাকৃষ্ণের একটি কাব্যিক ‘আর্কিটাইপ্’, আদিমরূপ বিদ্যাপতির পদাবলীতে লক্ষ্য করা গেল। সুতরাং বলা

চলে চৈতন্যবির্ভাবের পূর্বে বঙ্গে বৈষ্ণব ধর্মের প্রধান দুটি মাত্রা বা ধারা বিদ্যমান ছিল— একটি হ'ল- পঞ্চোপাসনার সঙ্গে সংশ্লিষ্ট বৈষ্ণবীয় ধর্মচর্চা; অন্যটি হ'ল— বৈষ্ণব পদ, গান ও কবিতা। এর সঙ্গে মাধবেন্দ্র পুরীর মধুর রসে কৃষ্ণোপাসনা এবং অদ্বৈত আচার্যের 'ভগবত-পুরাণ' চর্চার কথাও মনে রাখতে হবে।

## দুই

গৌড়ীয় বৈষ্ণব দর্শনানুসারে পরম পুরুষ ভগবান শ্রীকৃষ্ণ সচ্চিদানন্দ-স্বরূপ। আর শ্রীরাধা হলেন তাঁর হৃদিদীনী শক্তি বা আনন্দ-শক্তির ঘনসার বিগ্রহ। শ্রীকৃষ্ণ পরমপুরুষ; পরতত্ত্বের বিষয়। শ্রীরাধা মাধুর্য প্রতিমা; তিনি পরতত্ত্বের আশ্রয়। শ্রীকৃষ্ণ ও শ্রীরাধা উভয়ে পরম শক্তিমান ও পরমাশক্তি রূপে স্বরূপতঃ এক ও অভিন্ন; কিন্তু লীলা হেতু তাঁরা পরস্পর পৃথক। তাঁদের এই ভেদ ও অভেদ অচিন্ত্য কিন্তু নিত্যসত্য। নিত্যকিশোর ও নিত্যকিশোরী রূপে তাঁদের যুগললীলা অনাদি অনন্তকাল ধরে চলেছে ধামশ্রেষ্ঠ নিত্যবন্দাবনে। রাধা-কৃষ্ণ তত্ত্বের প্রতিষ্ঠা এবং তাঁদের যুগললীলা মাধুরীর ভাববিস্তার যে তত্ত্বের আধারে বিধৃত তা গৌড়ীয় বৈষ্ণবদর্শনে 'অচিন্ত্যভেদাভেদবাদ' নামে সুপরিচিত ও সুবিখ্যাত। এই মতবাদ বা তত্ত্ব মধ্যযুগীয় ভারতীয় ভক্তিদর্শন ও সাহিত্যে বাঙালীর মনন ও সাধনার শ্রেষ্ঠ ফসল।

মহাপ্রভু শ্রীচৈতন্যের মর্ত্যে আবির্ভাব খ্রীষ্টীয় পঞ্চদশ শতাব্দীর শেষপাদে (১৪৮৬ খ্রী.)। ষোড়শ শতাব্দীর প্রথমার্ধে শ্রীচৈতন্যের দিব্যোন্মাদলীলায় যে অপার্থিব রাধা প্রেম মর্ত্যলোকে মূর্ত হয়ে উঠেছিল, তাকে একটি দার্শনিক তত্ত্বরূপে সুপ্রতিষ্ঠিত করলেন শ্রীচৈতন্যেরই কৃপাধন্য বন্দাবনের ষড়গোস্বামী। এঁরা হলেন— সনাতন, রূপ ও জীব গোস্বামী, রঘুনাথ দাস, রঘুনাথ ভট্ট, ও গোপাল ভট্ট। এঁদের মধ্যে সনাতন, রূপ ও জীব গোস্বামী শুধু উচ্চকোটির সাধকই নন, তাঁরা ছিলেন কবি ও দার্শনিক। বৈষ্ণবীয় সাধনতত্ত্ব, ভক্তিদর্শন, অলঙ্কার ও রসপ্রস্থান বিষয়ে বহু সংস্কৃত গ্রন্থ তাঁরা রচনা করেছেন যার মধ্যে রাধা-কৃষ্ণ তত্ত্বের গভীর ও সূক্ষ্মাতিসূক্ষ্ম বিশ্লেষণ আছে। ষড় গোস্বামীর অন্যতম রঘুনাথ দাসের শিষ্য কবি, সাধক ও তত্ত্বজ্ঞ মনীষী কৃষ্ণদাস কবিরাজ গোস্বামী রাধা-কৃষ্ণ-তত্ত্ব ও গৌরতত্ত্বকে সমন্বিত করে যে 'চৈতন্য চরিতামৃত' কাব্য লিখলেন তা মধ্যযুগীয় বাংলা ভাষা সাহিত্য ও দর্শনের এক অক্ষয়-কীর্তি। বন্দাবনের পূর্বোক্ত ষড়গোস্বামী ও কৃষ্ণদাস কবিরাজ— এঁদের তত্ত্বালোচনার প্রধান আধার ও আশ্রয় হ'ল 'ভাগবত পুরাণ' ও 'বিষ্ণুপুরাণ'।

খ্রীষ্টীয় ষোড়শ শতাব্দীতে পুরাণাশ্রয়ী এই রাধাকৃষ্ণ-তত্ত্ব প্রতিষ্ঠা লাভ করার আগেই লোক জীবন-সম্পৃক্ত সংস্কৃত, প্রাকৃত, অপভ্রংশ এবং বাংলা কাব্য কবিতায় রাধা-কৃষ্ণ-প্রেমলীলার চিত্র অঙ্কিত হয়েছে বিচিত্র বর্ণে। তাই বলে অবশ্য, রাধা-কৃষ্ণ প্রেম প্রথমে লৌকিক এবং পরে তা দিব্যরূপ লাভ করেছে— এমন সিদ্ধান্তে উপনীত হওয়া চলবে না।

রাধা-কৃষ্ণ যুগল লীলার মূল প্রোথিত আছে— 'ঋক্-পরিশিষ্ট' এবং 'বৃহদারণ্যক' উপনিষদের মিথুনতন্ত্রে ও দ্বৈতলীলায়। আবার এর সঙ্গে গভীর সংযোগ আছে দীর্ঘকাল লালিত ভারতীয় শক্তিতত্ত্বের। এই প্রসঙ্গে বলে নেওয়া সম্ভব যে, ভারতীয় শক্তিতত্ত্বের সঙ্গে সমন্বিত দ্বৈতলীলা, চৈতন্যোত্তর সহজিয়া বৈষ্ণবদের 'আরোপ-তত্ত্ব' ও দেহসাধনার মধ্যে এক ভিন্ন রূপ লাভ করল। গৌড়ীয় বৈষ্ণব মতানুসারে, জীব কখনো শ্রীরাধা হতে পারে না, বড় জোর শ্রীরাধার সখী-অনুগত মঞ্জরী হতে পারে। গৌড়ীয় বৈষ্ণব ভক্ত নিত্যবৃন্দাবনে রাধা কৃষ্ণ-লীলার দ্রষ্টা ও সেবা-পরিকর মাত্র। কিন্তু ষোড়শ শতাব্দীর শেষ ও সপ্তদশ শতাব্দীর শুরু থেকেই সহজিয়া বৈষ্ণবগণ জীবদেহেই রাধা-কৃষ্ণ প্রেমের 'আরোপে'র মধ্য দিয়ে রাধা ভাবের সাধনা করেছেন। এঁদের এই সাধন প্রণালী গৌড়ীয় বৈষ্ণব দর্শনের রাধা কৃষ্ণ তত্ত্ব থেকে সম্পূর্ণ স্বতন্ত্র।

শ্রীচৈতন্য আপন দিব্য ভাব জীবনে অলোকসামান্য প্রেম সাধনার মধ্য দিয়ে আপামর জনমানবকে এক শুদ্ধসত্ত্ব ভাগবত জীবনের সন্ধান দিয়েছিলেন। ধর্ম-অর্থ-কাম-মোক্ষ— এই সুপরিচিত চতুর্ভুজের উর্ধ্বে তিনি প্রেমকেই পঞ্চম পুরুষার্থ হিসেবে ঘোষণা করলেন। আর এর ফলে গৌড়বঙ্গবাসীর চেতনালোকেই ঘটে গেল এক আমূল পরিবর্তন। শ্রীচৈতন্য দ্বৈতবাদী মাধব শিষ্য হলেও তিনি প্রতিষ্ঠা করেন এক ভিন্ন উপাস্যতত্ত্ব, তার লক্ষ্যও ভিন্নতর। গৌড়ীয় বৈষ্ণবদের সে উপাস্যতত্ত্ব হ'ল— রাধাকৃষ্ণ; আর তার লক্ষ্য হ'ল— পরমপ্রেম। শ্রীচৈতন্য ছিলেন অদ্বৈত-বেদান্তবাদের বিরোধী। অদ্বৈতবাদ উপনিষদে বর্ণিত জীবাত্মা ও ব্রহ্মের অভেদ-কল্পনার উপরে প্রতিষ্ঠিত। অদ্বৈতবাদী শঙ্করাচার্যের 'ব্রহ্মসূত্রে'র ভাষ্যকে চৈতন্য স্বীকার করেন নি। শঙ্করাচার্য ছিলেন বিবর্তবাদী। তাঁর মূল বক্তব্য হ'ল— 'আত্মিকত্ব'। অর্থাৎ একই আত্মা ভ্রান্তিবশত বহু জীব ও জগৎ বলে প্রতীয়মান হয়। শঙ্করাচার্যের মতে, ব্রহ্মই একমাত্র সত্য, জগৎ মিথ্যা। "ব্রহ্ম সত্যং জগৎ মিথ্যা, জীবো ব্রহ্মেব নাহপর", জগৎ হ'ল ব্রহ্মের মায়িক বিকাশ। জীব স্বরূপতঃ ব্রহ্ম। জীব ও ব্রহ্মের মধ্যে দ্বৈতত্ব নেই, তাই অদ্বৈতবোধের ধারণা। অদ্বৈতবাদীদের মতে, জগৎ মায়িক, তার কোন পারমার্থিক সত্তা নেই। জগৎ রজ্জুতে সর্পভ্রম বা শুক্লিতে রজতভ্রমের তুল্য অলীক (illusion) মাত্র। অবিদ্যা জীবকে মোহাচ্ছন্ন ক'বে আত্মার স্বরূপকে আবৃত করে। অদ্বৈতবাদ অনুসারে, এই অবিদ্যার বন্ধন ছিন্ন করে জীবের আত্মচৈতন্যের জাগরণ বা ব্রহ্মকৈবল্য লাভই হ'ল মোক্ষ— যা তাঁদের চূড়ান্ত লক্ষ্য ও কাম্য। শ্রীচৈতন্য তথা গৌড়ীয় বৈষ্ণব সাধক ও দার্শনিকগণ জীব ও জগতের এই প্রতিভাসিক সত্যতা অর্থাৎ মিথ্যাত্বের বিরোধী। এঁদের মতে, "জগৎ মিথ্যা নহে, নশ্বর মাত্র হয়।" শুধু জগৎ নয়, জীবও মিথ্যা নয়; জীব হ'ল ব্রহ্ম বা শ্রীকৃষ্ণের 'জীবশক্তি' বা 'তটস্থ শক্তি'রই প্রকাশ। প্রাকৃত জগৎ ব্রহ্মের 'বহিরঙ্গ' মায়াক্রমের পরিণতি। গৌড়ীয় বৈষ্ণবগণ শঙ্করাচার্যের মতো বিবর্তবাদী নন, তাঁরা পরিণামবাদী। এঁদের মতানুসারে, জীব ব্রহ্মের 'স্বরূপ শক্তি' নয়, আবার সে ব্রহ্মের 'মায়াক্রম'র অন্তর্গতও নয়— জীব এই দুয়ের মধ্যস্থ অর্থাৎ তটস্থ, সমুদ্র ও ভূখণ্ডের মধ্যবর্তী যেমন সমুদ্রতট তেমনই। জীব যেমন স্বয়ং ব্রহ্ম নয়, তেমন

আবার ব্রহ্ম-ব্যতিরিক্তও নয়। ব্রহ্মের সঙ্গে জীবের যুগপৎ অচিন্তনীয় ভেদ ও অভেদের সম্বন্ধ। এটিই বৌদ্ধীয় বৈষ্ণবাচার্যদের 'অচিন্ত্যভেদাভেদবাদের' দার্শনিক ভিত্তি। আমরা পরে এ সম্পর্কে আরও আলোচনা করব। এই 'অচিন্ত্যভেদাভেদবাদ'-এ জগৎ ও জীবনবিরোধী অদ্বৈতবাদকে নিরাকৃত করে দ্বৈতবাদকে সুপ্রতিষ্ঠিত করা হয়েছে। এতে পার্থিব জগৎ ও জীবনকে অস্বীকার করা হয়নি, তা হয়েছে দিব্যজীবনের অন্তর্গত। এই মতবাদ এই বোধের জগরণ ঘটাল যে, পরব্রহ্মের সঙ্গে জীবের সম্বন্ধ শক্তিমান ও শক্তির মধ্যকার নিত্য সম্বন্ধ। এর ফলে শক্তিমান পরব্রহ্মের স্বরূপ শক্তি সম্বন্ধে সন্ধিৎসা জাগল। এই পরব্রহ্মই ভগবান শ্রীকৃষ্ণ আর এই স্বরূপ শক্তিই হল শ্রীরাধা যিনি সেই পরম প্রেমময় শ্রীকৃষ্ণের আরাধিকা ও আরাধিতা 'শক্তিরূতমা'।

### তিন

গৌড়ীয় বৈষ্ণব দর্শনের মূল ভিত্তি 'অচিন্ত্যভেদাভেদবাদ', এবং 'রাধাকৃষ্ণ-তত্ত্ব' ও 'গৌরতত্ত্ব' বিষয়ে আলোচনাতে প্রবেশ করার আগে চৈতন্যপূর্ববর্তী বৈষ্ণব সম্প্রদায় সম্পর্কে কয়েকটি কথা এখানে অতি সংক্ষেপে বলে নিতে চাই। চৈতন্যপূর্ব বৈষ্ণবদের ছিল চারটি প্রধান সম্প্রদায়— শ্রী, ব্রহ্ম, রুদ্র ও সনক। গৌড়ীয় বৈষ্ণবগণ গড়ে তোলেন পঞ্চম—শ্রী চৈতন্য সম্প্রদায়।

ক) রামানুজের বিশিষ্টাদ্বৈতবাদ - ত্রীতীয় একাদশ শতকে বিশিষ্টাদ্বৈতবাদী আচার্য রামানুজ 'ব্রহ্মসূত্রের' 'শ্রীভাষ্য' রচনা করে শ্রী- সম্প্রদায়ের প্রতিষ্ঠা করেন। তাঁর মতে জীব ও মায়া উভয়েই ব্রহ্মাশ্রিত। জীব চিৎ মায়া অচিৎ। শ্রীকৃষ্ণ বা শ্রীরাধার কোন উল্লেখ রামানুজ করেননি।

খ) মধ্বাচার্যের দ্বৈতবাদ - মধ্বাচার্য ব্রহ্ম সম্প্রদায়ের প্রতিষ্ঠাতা। তিনি দ্বৈতবাদী, কিন্তু আত্মাত্মিক ভেদবাদী। তাঁর মতে - ব্রহ্ম, বিষ্ণু, হরি বা নারায়ণ সর্বোত্তম সত্য। জীবজগৎ সত্য, কিন্তু তা ব্রহ্ম বা বিষ্ণু থেকে নিত্য ভিন্ন। শ্রী সম্প্রদায়ের মতো মধ্ব-সম্প্রদায়েও লক্ষ্মী-নারায়ণই উপাস্য। এখানেও শ্রীকৃষ্ণ ও শ্রীরাধার কোন উল্লেখ নেই।

গ) বল্লভাচার্যের বিশিষ্টাদ্বৈতবাদ - রুদ্র সনক সম্প্রদায়ে লক্ষ্মীর স্থলে শ্রীরাধার প্রতিষ্ঠা হয়েছে। বিষ্ণুপন্থী থেকে রুদ্র সম্প্রদায়ের সূচনা হলেও পঞ্চদশ ষোড়শ শতাব্দীতেই বল্লভাচার্য 'ব্রহ্মসূত্রের' নতুন ভাষ্য রচনা করে এই সম্প্রদায়ে 'বিশিষ্টাদ্বৈতবাদ' কে প্রতিষ্ঠা করেন। শঙ্করাচার্য বলেন, ব্রহ্মই একমাত্র সত্য কারণ জগৎ মিথ্যা। কিন্তু বল্লভাচার্যের মতে ব্রহ্মই একমাত্র সত্য কারণ জীবজগৎ ব্রহ্মের সঙ্গে অভিন্ন। বল্লভাচার্য ব্রজবিহারী কৃষ্ণকেই পরব্রহ্ম বলেছেন। বল্লভাচার্যের পুত্র বিষ্ণুনাথ রাধার স্তোত্র রচনা করে এই সম্প্রদায়ে রাধাবাদের প্রতিষ্ঠা করেন।

ঘ) নিখার্কে'র দ্বৈতাদ্বৈতবাদ - সনকাদি - সম্প্রদায়ের বা হংস সম্প্রদায়ের প্রবর্তক নিখার্কাচার্য বা আচার্য নিয়মানন্দ। ইনি 'ব্রহ্মসূত্রের' 'বেদান্ত পারিজাত সৌরভ' নামক

ভাষ্য রচনা করে 'দ্বৈতাদ্বৈতবাদ'-এর প্রতিষ্ঠা করেন। নিম্বার্ক স্বাভাবিক ভেদাভেদবাদী এবং পরিণামবাদী। তাঁর মতে, ব্রহ্ম অনস্ত্যচিন্ত্য শক্তিমান। জীব জগৎ সংকলিত এই বিশুব্রহ্মাণ্ড ব্রহ্মেরই পরিণাম। জীব ব্রহ্মের চিৎ-শক্তির এবং জগৎ ব্রহ্মের অচিৎ-শক্তির বিকাশ। ব্রহ্ম ও জীব-জগৎ স্বরূপতঃ ও গুণতঃ ভিন্নাভিন্ন।

উল্লিখিত চারটি সম্প্রদায়ের মধ্যে শ্রী ও ব্রহ্ম শক্তিরূপে লক্ষ্মীর প্রাধান্য, কিন্তু রুদ্র ও সনকাদি সম্প্রদায়ে লক্ষ্মীর স্থানে শ্রীরাধার প্রাধান্য। গৌড়ীয় বৈষ্ণব চৈতন্য সম্প্রদায়ে শ্রীরাধার একচ্ছত্র প্রাধান্য।

গৌড়ীয় বৈষ্ণব দর্শনে 'অচিন্ত্যভেদাভেদবাদ', 'রাধা-কৃষ্ণ-তত্ত্ব' ও 'গৌরতত্ত্ব' : 'ভাগবত পুরাণ' ও 'বিষ্ণুপুরাণে'র উপরই গৌড়ীয় বৈষ্ণব দর্শনের 'অচিন্ত্যভেদাভেদবাদ' 'রাধাকৃষ্ণতত্ত্ব' ও 'গৌরতত্ত্ব'র ভিত্তি প্রতিষ্ঠিত। 'অচিন্ত্যভেদাভেদবাদ' গৌড়ীয় বৈষ্ণব ধর্ম-দর্শন ও সাহিত্যের প্রাণকেন্দ্র। এই দার্শনিক মতবাদটিকে অবলম্বন করেই গৌড়ীয় বৈষ্ণবের যাবতীয় ধর্মাচরণ, শাস্ত্র-সম্পদ ও সাহিত্য-রস মন্দাকিনী উৎসারিত হয়েছে। মহাপ্রভু শ্রীচৈতন্য স্বয়ং, মোহগ্রস্ত জীবকে যথার্থ পথের দিশা দেখাতেই, এই ধর্মমতের প্রবর্তনা ও ব্যাখ্যা করেন। পরে মহাপ্রভুর নির্দেশেই সনাতন গোস্বামী তাঁর 'বৃহৎ ভাগবতামৃতে' ও বৈষ্ণবতোষণী টীকায়, রূপ গোস্বামী তাঁর 'লঘুভাগবতামৃতে' এবং জীব গোস্বামী তাঁর 'ভগবৎসন্দর্ভ' ও 'সর্বসম্বাদিনী'তে অচিন্ত্যভেদাভেদবাদের বিস্তৃত পরিচয় দিয়েছেন।

'অচিন্ত্যভেদাভেদবাদ' সম্পর্কে আলোচনা করতে গেলে প্রথমেই বলা প্রয়োজন যে, এই ধর্মীয় মতবাদটির নামের আদিতে প্রযুক্ত 'অচিন্ত্য' শব্দটির একটি বিশেষ তাৎপর্য আছে। নিম্বার্ক স্বামীর 'ভেদাভেদবাদ' বা 'দ্বৈতাদ্বৈতবাদ' থেকে গৌড়ীয় বৈষ্ণবদের এই মতবাদকে স্বাতন্ত্র্য বা বিশেষত্ব দানের জন্য মাত্র 'অচিন্ত্য' শব্দটি ব্যবহৃত হয়নি। পরন্তু শব্দটির সংযোজনের ভিন্নতর তাৎপর্য আছে।

ক) অচিন্ত্য শব্দটির আক্ষরিক অর্থ হ'ল যা চিন্তা করা যায় না — অচিন্তনীয় অর্থাৎ যা বুদ্ধির অগম্য। তাত্ত্বিক বৈষ্ণবাচার্যগণের মতে 'স্বয়ং ভগবান' শ্রীকৃষ্ণের অপ্রাকৃত লীলা বিশ্বাস নিয়ে এই ভেদাভেদবাদ সাধারণ মানুষের ক্ষুদ্র বুদ্ধিতে উপলব্ধি করা একান্ত দুর্লভ — তাই এই ভেদাভেদবাদ 'অচিন্ত্য'।

খ) জীব ও জগতের সঙ্গে ভগবানের ভেদ ও অভেদ সম্পর্ককে উপলব্ধি করতে হয় হৃদয় দিয়ে এবং সাধনার পথে, সাধারণ বুদ্ধি বা তর্কে তা আয়ত্ত্বাতীত, সেজন্যও মতবাদটি 'অচিন্ত্য'।

গ) সূক্ষ্মতম যুক্তিটি এই যে, বৈশেষিক দর্শন মতে পদার্থ দু'রকম - ভাব ও অভাব। দার্শনিক মতে, সমস্ত ভাববস্তুরই শক্তি অচিন্ত্যজ্ঞানগোচর ( যেমন জলের মধ্যে আঙুন নেভানোর শক্তি সম্পর্কে জ্ঞান সাধারণভাবে বুদ্ধির অগোচর)। অর্থাৎ যে জ্ঞান কোন বুদ্ধি-তর্কের দ্বারা প্রতিষ্ঠা করা কঠিন, অথচ প্রত্যক্ষ সত্য হওয়ায় যাকে অস্বীকারের উপায় নেই, সেই জ্ঞানই হ'ল 'অচিন্ত্য' জ্ঞান। গৌড়ীয় বৈষ্ণব মতবাদ অনুসারে ভগবান শ্রীকৃষ্ণ

ও তাঁর শক্তি (বহিরঙ্গা, তটস্থা ও অন্তরঙ্গা) - এই দুয়ের মধ্যে অভেদ চিরবিরাজমান অথচ ভেদও প্রতীত হয়। এই পরস্পরবিরোধী ব্যাপার কীভাবে সম্ভাবিত হতে পারে তা সাধারণ মানুষ প্রাকৃত নিয়মে বুঝতে পারে না, তাই এই ভেদাভেদবাদ 'অচিন্ত্য'।

আগেই বলেছি, গৌড়ীয় বৈষ্ণব দর্শনের 'অচিন্ত্যভেদাভেদবাদ', রাধাকৃষ্ণতত্ত্ব ও গৌরবতত্ত্বের ভিত্তি প্রোথিত আছে 'ভাগবতপুরাণ' ও 'বিষ্ণুপুরাণ'-এ। শ্রীচৈতন্য মহাপ্রভুর মতানুসারে "আরাধ্য: ভগবান ব্রজেশতনয় স্তদ্ধামং বৃন্দাবনং।/ রম্যা কাচিপাসনা ব্রজবধুবর্গেন যা কল্পিতা।।" — ভগবান শ্রীকৃষ্ণই একমাত্র আরাধ্য। বৃন্দাবন তাঁর নিত্যবিগ্রহলীলাধাম। ব্রজগোপীগণের রমনীয় উপাসনাই শ্রেষ্ঠ। প্রেমভক্তিই পরম ও চরম পুরুষার্থ। বৈষ্ণবের পরমারাধ্য ভগবান শ্রীকৃষ্ণ পরম শক্তিমান এবং সচ্চিদানন্দ স্বরূপ। বিভিন্ন পুরাণে ভগবানের ত্রিবিধ শক্তির কথা উল্লিখিত হয়েছে। 'বিষ্ণুপুরাণে' এ সম্পর্কে বলা হয়েছে —

"বিষ্ণুশক্তি: পরা প্রোক্তা ক্ষেত্রজ্ঞাখ্যা তথাহপরা।

অবিদ্যা কর্মসংজ্ঞান্যা তৃতীয়া শক্তিরিষ্যতে।।" (৬/৭/৬১)

- অর্থাৎ বিষ্ণুর (শ্রী ভগবানের) শক্তি 'পরা' 'ক্ষেত্রজ্ঞা' ও 'অপরা' নামে অভিহিত। কর্মসংজ্ঞক অবিদ্যা (বা অপরা) তৃতীয় শক্তি।

এই উক্তির নিগলিতার্থ হচ্ছে এই — ভগবান বিষ্ণু বা শ্রীকৃষ্ণের শক্তি তিন প্রকার — (১) 'পরা' শক্তি বা 'স্বরূপ' শক্তি। একে 'চিচ্ছক্তি' ও বলা হয় কারণ এটি জড় বিরোধী ও চিন্ময় শক্তি। এটি শ্রেষ্ঠ 'অন্তরঙ্গা' শক্তি; কারণ এর সঙ্গে শ্রীকৃষ্ণের সম্বন্ধ নিবিড়তম। (২) 'ক্ষেত্রজ্ঞা' বা 'তটস্থা' শক্তি। এটি জীবশক্তি। (৩) 'কর্মসংজ্ঞা' বা 'অবিদ্যা' বা 'অপরা' বা 'মায়া' শক্তি। এটি বহিরঙ্গা শক্তি। গৌড়ীয় বৈষ্ণব দর্শনে ভগবান শ্রীকৃষ্ণের এই ত্রিবিধ শক্তি স্বীকৃত হয়েছে। এই দর্শন-অনুসারে 'স্বরূপশক্তি' বা 'অন্তরঙ্গা' শক্তি দ্বারা শ্রীকৃষ্ণ পূর্ণ ভগবৎ-স্বরূপে এবং বৈকুণ্ঠাদিধাম ও নিত্য পরিকর-রূপে স্বরূপ বৈভবে অবস্থান করেন। অর্থাৎ আমাদের ধ্যানের জগতে স্বরূপ শক্তিতে বিরাজ করেন। যেখানে তিনি লীলাবিলাসের জন্য শ্রীকৃষ্ণ, শ্রীরাধা, নন্দ-যশোদা ও গোপ-গোপীরূপ পরিগ্রহ করেছেন। 'জীবশক্তি' দ্বারা তিনি 'বিদেকাগ্নাশুদ্ধ-জীব' রূপে অবস্থিত। ক্ষুদ্র জীব থেকে মানুষ পর্যন্ত সমস্ত জীবের মধ্যে ভগবানের এই শক্তি বিরাজিত। আর 'বহিরঙ্গা' বা 'মায়া' শক্তি বলে ভগবানের জড়াত্ম্যপ্রধান প্রকৃতিরূপে অবস্থান। সমস্ত স্থাবর বা জড়পদার্থে ভগবানের এই অবিদ্যা বা 'মায়া'শক্তির প্রকাশ। 'ক্ষেত্রজ্ঞা' বা 'জীব' শক্তি হ'ল অন্তরঙ্গা 'স্বরূপ'-শক্তি এবং বহিরঙ্গা 'মায়া' শক্তির মধ্যবর্তিনী এক 'তটস্থা' শক্তি। যেমন সমুদ্রের তট, সমুদ্র ও ভূখণ্ডের মধ্যবর্তী। সে যেমন সমুদ্রের অন্তর্গতও নয় আবার তার বহির্ভূতও নয়, তেমনই জীব ভগবান শ্রীকৃষ্ণের অন্তরঙ্গ 'চিচ্ছক্তির' অন্তর্গত নয় আবার তার বহিরঙ্গা 'মায়া-শক্তি'রও অন্তর্ভুক্ত নয়। উভয় কোটিতেই জীবের প্রবেশের অভাব আছে। কিন্তু আবার উভয়কোটিতে প্রবেশের সামর্থ্যও আছে। জীবশক্তির আবার দুটি সর্গ — একটি অনাত্মকাল ধরে ভগবৎ - উন্মুখ, আর অন্যটি অনাদিকাল থেকে ভগবৎ-

পরাম্বুখ। প্রথম বর্গের জীব শ্রীকৃষ্ণের 'অস্তরঙ্গ' 'স্বরূপ-শক্তি'র বিলাসের দ্বারা অনুগৃহীত হয়ে বৈকুণ্ঠধামে নিত্য ভগবৎ পরিকরত্ব অর্জন করে। দ্বিতীয় বর্গের জীব 'বহিরঙ্গ' 'মায়া-শক্তি'র দ্বারা পরিগৃহীত হয়ে সংসার বন্ধ হয়। অবশ্য 'জীবশক্তি' ও 'মায়াশক্তি' পরস্পর পৃথক। 'জীবশক্তি' চৈতন্যস্বভাব, কিন্তু 'মায়াশক্তি' জড়স্বভাব। জীব এবং ব্রহ্ম বা ভগবান শ্রীকৃষ্ণ যুগপৎ ভেদ ও অভেদ। পরব্রহ্ম শ্রীকৃষ্ণের অনন্তশক্তির মধ্যে 'জীবশক্তি' তাঁর অংশমাত্র। জীব শুদ্ধস্বরূপশক্তি বিশিষ্ট ব্রহ্ম বা শ্রীকৃষ্ণের অংশ নয় — তাঁর জীবশক্তি-বিশিষ্ট রূপেরই অংশ। গৌড়ীয় বৈষ্ণবমতে পরম মাধুর্যময় ও প্রেমময় শ্রীকৃষ্ণ লীলার জন্যই বৃন্দাবনে বিভিন্ন প্রকার রূপ পরিগ্রহ করেছেন। কিন্তু এই বিভিন্ন প্রকার রূপ সত্ত্বেও শ্রী ভগবানে স্বগতভেদ নেই, কারণ সেখানে একই প্রকার উপাদান থাকায় দেহ ও দেহীতে ভেদ অনুপস্থিত। 'অচিন্ত্যভেদাভেদ' বাদে এভাবে অভেদবাদ যেমন স্বীকৃত তেমনি ভেদবাদও প্রপঞ্চিত হয়েছে। এক শ্রী ভগবান থেকেই জীব ও জগৎ সৃষ্টি হয়েছে, তথাপি এ দুই ক্ষেত্রে ভগবানের শক্তি রূপান্তরিত হয়ে গিয়েছে তাই তারা পরিণামের অন্তর্গত। জড়-জগৎ অচিৎ; এ ভগবানের স্বরূপ শক্তির বিপরীত দিক থেকে জীবকে সততই মোহগ্রস্ত করার চেষ্টা করছে। জীবশক্তি — স্বরূপশক্তি ও মায়াশক্তির মধ্যবর্তী তাই একে 'তটস্থ' শক্তি বলা হয়েছে। এই জীবশক্তি শ্রীভগবানের 'বহিরঙ্গ' শক্তির প্রভাবে যেমন মোহগ্রস্ত হতে পারে, তেমনি আবার শ্রীভগবানের সাধনা করে তাঁর স্বরূপ কোটির একান্ত সান্নিধ্যও লাভ করতে পারে। এই জীব ও জড় জগৎ একই শ্রীভগবান থেকে সৃষ্ট হলেও, আর তাঁর সঙ্গে একাকার হতে পারে না। যদিও জীবের কামা ভগবানের স্বরূপ কোটির একান্ত সান্নিধ্যে উপনীত হয়ে শ্রীভগবানের নিত্যমধুরলীলা অবলোকন করা, কিন্তু জীব কখনো শ্রীভগবানের সঙ্গে সাযুজ্য মুক্তি চাইতে পারে না। গৌড়ীয় বৈষ্ণব দর্শন অনুসারে জীব অণু স্বভাব — সঙ্কীর্ণতার দিকেই তার প্রবণতা, অন্যদিকে শ্রীভগবান স্বরূপ কোটিতে বিদুষ্ট ভাব — তাঁর প্রবণতা ব্যাপ্তির প্রতি। এই জন্যই জীব ও ভগবান — দুই বিপরীতধর্মী সত্তা — কখনো পরস্পরের সঙ্গে সম্পূর্ণ মিলিত হতে পারে না। অবশ্য একথাও সত্য যে, জীব লয় মুক্তি বা ভগবানের সঙ্গে নিঃশেষে মিলতে চায় না, কারণ তাহলে পৃথক সত্তার লোপে শ্রীভগবানের পরম মাধুর্য সম্যক্ আত্মদান করা সম্ভব হবে না। জীব চায়, ভগবানের এই পরম মাধুর্যের পূর্ণ আত্মদান।

শ্রীকৃষ্ণ বা পরব্রহ্ম আনন্দ স্বরূপ ও রস স্বরূপ। তিনি বিশেষ্য। আর 'স্বরূপ-শক্তি' 'তটস্থ-শক্তি', ও 'মায়া-শক্তি' হ'ল তাঁর বিশেষণ। 'স্বরূপ-শক্তি' থাকার জন্য শ্রীকৃষ্ণ লীলা (পরকীয়া লীলা) করতে পারেন। সচ্চিদানন্দ স্বরূপ শ্রীকৃষ্ণের 'স্বরূপ-শক্তি' মূলত: ত্রিবিধ — 'সঙ্কিনী', 'সংবিৎ' ও 'ত্বাদিনী'। এই তিনশক্তি গুণবর্জিত বা ত্রিগুণাতীত ভগবান শ্রীকৃষ্ণের মধ্যে নেই। কিন্তু তাঁর স্বরূপশক্তির অন্তর্গত হয়ে আছে এই তিনশক্তি — সং, চিৎ ও আনন্দ শক্তি। সদংশে এটি 'সঙ্কিনী', চিদংশে 'সংবিৎ' এবং আনন্দাংশে 'ত্বাদিনী' শক্তি।

“সচ্চিদানন্দ-পূর্ণ কৃষ্ণের স্বরূপ।  
 একই চিচ্ছক্তি তাঁর ধরে তিন রূপ।।  
 আনন্দাংশে হুাদিনী সদংশে সচ্চিনী।  
 চিদংশে সচ্চিৎ যারে জ্ঞান করি মানি।।”

‘সচ্চিনী’ হল অস্তিত্বরূপা, ‘সংবিৎ’ জ্ঞানরূপা আর ‘হুাদিনী’ হল আনন্দ ও প্রেমরূপা শক্তি। ভগবান শ্রীকৃষ্ণের এই ‘হুাদিনী’ শক্তির ঘনসার বিগ্ৰহ হলেন শ্রীরাধা। এই ‘হুাদিনী’র সার হ’ল ‘প্রেম’। এই ‘প্রেম’ই গাঢ়তা প্রাপ্ত হয়ে ক্রমে মেহ, মান, প্রণয়, রাগ, অনুরাগ ও ভাবের পর্যায় অতিক্রম করে পরিণতি লাভ করে ‘মহাভাব’-এ। এই ‘মহাভাব’ের আবার চারটি স্তর - ‘রূঢ়’, ‘অধিরূঢ়’, ‘মোদন’ ও ‘মাদন’। ‘মাদন’ই প্রেমের সবচেয়ে ঘনীভূত স্তর — এটি ‘স্বয়ংপ্রেম’। হুাদিনীর শ্রেষ্ঠ সার এই মাদনাখ্য মহাভাব একমাত্র শ্রীরাধাতেই বিদ্যমান, অন্যান্য ব্রজগোপীদের মধ্যে তা অনুপস্থিত। ‘চৈতন্যচরিতামৃত’ের ‘আদিলীলা’র চতুর্থ পরিচ্ছেদে কৃষ্ণদাস কবিরাজ গোস্বামী তাই বলেছেন — ‘মহাভাবস্বরূপা শ্রীরাধা ঠাকুরানী’।

বিভিন্ন পুরাণ ও বৈষ্ণব-শাস্ত্র অনুসারে শ্রীরাধা শ্রীকৃষ্ণের অন্তরঙ্গ-স্বরূপ-শক্তি-শ্রেষ্ঠা। তিনি অন্তরঙ্গে স্বকীয়া কৃষ্ণকান্তা, কিন্তু লীলার্থে পরকীয়া নাগিকা। ‘চৈতন্যচরিতামৃত’-কার কৃষ্ণদাস কবিরাজ গোস্বামী বলেছেন - “পরকীয়াভাবে অতিরসের উল্লাস।’ স্বরূপতঃ শক্তিমান ও শক্তি, শ্রীকৃষ্ণ ও শ্রীরাধা পরস্পর অভেদ। কৃষ্ণদাস কবিরাজ গোস্বামী ‘চৈতন্য চরিতামৃত’ের আদিলীলার চতুর্থ পরিচ্ছেদে রাধাকৃষ্ণের অভেদত্ব বর্ণনা করেছেন এভাবে —

“রাধা পূর্ণশক্তি কৃষ্ণ পূর্ণশক্তিমান।  
 দুই বস্তু ভেদ নাহি শাস্ত্র পরমাণ।।  
 মৃগমদ্ তার গন্ধ যৈছে অবিচ্ছেদ।  
 অগ্নি জ্বালাতে যৈছে কড় নহে ভেদ।।  
 রাধাকৃষ্ণ ঐছে সদা একই স্বরূপ।  
 লীলারস আশ্বাদিতে ধরে দুইরূপ।।” (৯৫-৯৭)

অচিন্ত্য কৃষ্ণ শক্তিবলে অভেদে লীলাবিলাসে ভেদ— এই হ’ল নৌড়ীয় বৈষ্ণব আচার্যগণের ‘অচিন্ত্য ভেদাভেদবাদে’র মর্মরহস্য। প্রশ্ন উঠতে পারে, শ্রীরাধা ও শ্রীকৃষ্ণ অর্থাৎ শক্তি ও শক্তিমান স্বরূপতঃ অভেদ কল্পিত হয়েও আবার ভেদ জ্ঞান কেন? বৈষ্ণব তাত্ত্বিক ও দার্শনিকগণ এর উত্তর দিয়েছেন এই যে, উভয়ে স্বরূপত এক হয়েও লীলাঙ্কলে দুই বা যুগল। প্রকটলীলায় কৃষ্ণশক্তি যোগমায়া শ্রীকৃষ্ণ ও শ্রীরাধার নিত্য সখ্যতার জ্ঞান আচ্ছাদিত করে তাঁদের মধ্যে যুগল ভাব এবং পরকীয়া ভাবের সৃষ্টি করেন। স্বরূপ জ্ঞান আচ্ছাদিত করে কেন এই পরকীয়া ভাবের সৃষ্টি? এর উত্তর কবিরাজ গোস্বামীর ভাষায় দিতে হয়— ‘পরকীয়া ভাবে অতিরসের উল্লাস’ ভগবান শ্রী কৃষ্ণের এই রসাহাদনের



জন্যই এই পরকীয়া ভাবের সৃষ্টি। প্রসঙ্গটিকে আর একটু বিস্তৃত করে বলতে পারি—  
কৃষ্ণের বৃন্দাবনলীলা সর্বদাই হয়। তাঁর এই লীলা কখনও প্রকট আবার কখনও বা অপ্রকট।  
অপ্রকট কৃষ্ণলীলায় কৃষ্ণের প্রেয়সীগণ পরস্ত্রী। রূপ গোস্বামীর মতে, তাঁরা পরস্ত্রী হলেও  
তাঁদের পতিদের সঙ্গে তাঁদের কখনই যৌন সম্বন্ধ থাকে না। স্বামী সঙ্গে বাসকাল,  
যোগমায়ার প্রভাবে তাঁদের কোনরূপ বাস্তব অস্তিত্বই থাকে না। ফলে শ্রীকৃষ্ণ কখনই পরস্ত্রী  
সম্ভোগ-পাপে লিপ্ত হন না। তবে পরম পুরুষ ভগবান শ্রীকৃষ্ণের পক্ষে যা সম্ভব সাধারণ  
মানুষের পক্ষে তা পাপ। তাই মানুষের পক্ষে শ্রীকৃষ্ণের অনুকরণ করা অনুচিত বা অসম্ভব।  
শ্রীকৃষ্ণের এইরূপ লীলা তার ভক্তবাঞ্ছা পূরণের নিমিত্তই।

নিবিড় ভক্তি থেকে উৎসারিত, কৃষ্ণ নিবেদিত প্রেমের ছটি স্তর বিদ্যমান। এগুলি  
হ'ল — ব্রহ্মানন্দ, শাস্তরতি, প্রেমভক্তি অথবা দাস্যরতি, সখ্যরতি, বাৎসল্যরতি এবং মধুর  
রতি। সর্বোচ্চ স্তর হ'ল মধুর রতি; এতে শ্রীকৃষ্ণ প্রেমিকরূপে পূজিত হন। গৌড়ীয় বৈষ্ণব  
মতে, কবিরাজ গোস্বামীর ভাষায় —

“গুণাধিক্যে স্বাদাধিক্য বাঢ়ে প্রতি রসে।

শাস্ত দাস্য সখ্য বাৎসল্যের গুণ মধুরেতে বৈসে।।”

অর্থাৎ প্রেমিক রূপে কৃষ্ণপাসনায় শাস্ত দাস্য সখ্য বাৎসল্য রতি মিশ্রিত হয়। আর একটা  
কথা, শ্রীকৃষ্ণ চিরপ্রেমিক, চিরকিশোর। কৃষ্ণপ্রেমে কাম দেখা দিলেও তাতে কাম থাকে না।  
আবার কৃষ্ণ প্রণয়িনী গোপীদের মনেও কামভাব থাকে না। তাতে থাকে ‘মহাভাব’। এ  
প্রসঙ্গে কৃষ্ণদাস কবিরাজ গোস্বামীর ভাষা —

“গোপীগণের প্রেম রুঢ় মহাভাব নাম।

বিশুদ্ধ নির্মল প্রেম কড়ু নহে কাম।।

কাম প্রেম দোঁহাকার বিবিধ লক্ষণ।

লৌহ আর হেম য়েছে স্বরূপ বিলক্ষণ।।

আত্মেন্দ্রিয়-প্ৰীতি ইচ্ছা তারে বলি কাম।

কৃষ্ণেন্দ্রিয়-প্ৰীতি ইচ্ছা ধরে প্রেম নাম।।

কামের তাৎপর্য নিজ সম্ভোগ কেবল।

কৃষ্ণসুখ তাৎপর্য হয় মহাবল ।। ...

অতএব কাম প্রেম বহুত অন্তর।

কাম অন্ধতম প্রেম নির্মল ভাস্বর।।”

গৌড়ীয় বৈষ্ণব দর্শন ও সাধনায় ‘রাধাকৃষ্ণ-তত্ত্বের’ সঙ্গে সমন্বিত হয়েছে  
‘গৌরতত্ত্ব’। শ্রী গৌরানন্দ বা শ্রীচৈতন্য অন্তরে শ্রীকৃষ্ণ, কিন্তু বাইরে তিনি রাধার গৌর-  
কান্তি নিয়ে আবির্ভূত। গৌড়ীয় বৈষ্ণবদের এই গৌর-তত্ত্বের মূল নিহিত আছে ‘ভাগবত-  
পুরাণের’ এই শ্লোকটিতে —

“কৃষ্ণবর্ণং ত্রিষাহকৃষ্ণং সাদ্রোপাদ্রপার্ষদম্।

যজ্ঞেঃ সংকীর্তন প্রায়ৈর্যজন্তি হি সুমেধসঃ।।” (১১/৫/৩২)

অর্থাৎ “যাঁরা সুমেধা তাঁরা সংকীর্তন যজ্ঞে সেই কৃষ্ণবর্ণনাকারী এবং কাণ্ডিতে অকৃষ্ণবর্ণকে সাদ্রোপাদ্রপার্ষদসহ যজ্ঞনা করে থাকেন।”

এই বর্ণনা শ্রীচৈতন্যের সঙ্গে মিলে যায়। তাই বলা হয়, দ্বাপরে ব্রজধামে লীলার্থে পৃথক রাধাকৃষ্ণ কলিতে নবদ্বীপধামে শ্রীগৌরান্দ বা শ্রীচৈতন্যরূপে ঐক্যমূর্তি ধরে আবির্ভূত হন। এই প্রসঙ্গে কৃষ্ণদাস কবিরাজ গোস্বামী তাঁর চৈতন্যচরিতামৃতের আদিলীলার চতুর্থ পরিচ্ছেদে স্বরূপ দামোদরের কড়চা থেকে দুটি প্রামাণ্য শ্লোক উৎকলিত করেছেন।

প্রথম শ্লোকটি হ'ল —

১) “রাধাকৃষ্ণ প্রণয় বিকৃতিহুঁদিনী শক্তিরস্মাদ্  
একাস্মানাবপি ভুবি পুরা দেহভেদং গতো তৌ।  
চৈতন্যাখ্যাং প্রকটমধুনা তদ্বয়ধৈক্যমাগুং  
রাধাভাবদুতিসুবলিতং নৌমি কৃষ্ণস্বরূপম্।।”

- অর্থাৎ “রাধা কৃষ্ণের প্রণয়বিকার বা গাঢ় প্রেমবিলাস-রূপা মূর্তিমতী হুঁদিনী শক্তি। তাঁরা স্বরূপতঃ একাত্মা হয়েও অনাদিকাল থেকে ভুবনে (গোলোকে) লীলার্থে ভিন্ন ভিন্ন দেহধারণ করেছিলেন। অধুনা প্রকট মাধুর্যমূর্তি শ্রীচৈতন্যে উভয়ে একীভূত। শ্রীরাধার ভাব ও অঙ্গকান্তির দ্বারা সুবলিত শ্রীকৃষ্ণস্বরূপ সেই শ্রীকৃষ্ণ চৈতন্যকে প্রণাম করি।”

দ্বিতীয় শ্লোকটি হ'ল —

২) “শ্রীরাধায়াঃ প্রণয়মহিমা কীদৃশো বানয়েবা  
স্বাদ্যো যেনাস্তুতমধুরিমা কীদৃশো বা মদীয়ঃ।  
সৌখ্যধ্বঙ্গস্য মদনুভবতঃ কীদৃশং বেতি লোভাৎ  
তস্ত্বাবাচ্যঃ সমজনি শচীগর্ভসিন্ধৌ হরীন্দুঃ।।”

শ্লোকটির নিগলিতার্থ এই যে, - দ্বাপরে প্রকটলীলায় শ্রীকৃষ্ণ প্রেমের বিষয় এবং শ্রীরাধা প্রেমের আশ্রয় হওয়ায় শ্রীরাধার প্রেমের পূর্ণ আনন্দন করা তাঁর পক্ষে সম্ভব হয়নি। তাই দ্বাপর লীলায় শ্রীকৃষ্ণের তিনটি বাঙ্গা অপূর্ণ ছিল। সেগুলি হ'ল — ক) শ্রীরাধার প্রেমের মাহাত্ম্য কিরূপ? খ) ঐ প্রেমের দ্বারা শ্রীরাধা কর্তৃক আন্বাদিত আমার বা শ্রীকৃষ্ণের নিজ মাধুর্যই বা কিরূপ? এবং গ) আমার অর্থাৎ শ্রীকৃষ্ণের মাধুর্য আন্বাদনে শ্রীরাধার যে সুখানুভব হয়, তার স্বরূপই বা কি? নিজে রাধা না হ'লে তো শ্রীকৃষ্ণের ঐ তিনটি বিষয় অনুভব ও আন্বাদনের বাঙ্গা পূর্ণ হতে পারে না। তাই এই তিন অপূর্ণ বাঙ্গা পূর্ণ করবার জন্য স্বয়ং ভগবান শ্রীকৃষ্ণ শ্রীগৌরান্দচন্দ্ররূপে শচীগর্ভ-সিন্ধুতে আবির্ভূত হলেন। বলা বাঙ্গা দ্বাপরলীলায় শ্রীকৃষ্ণ প্রেমের বিষয়রূপে থেকে আশ্রয়রূপ শ্রীরাধার প্রেম ও তজ্জনিত আনন্দের আন্বাদন করতে পারেননি। তাই তিনি একই সঙ্গে প্রেমের বিষয় ও

আশ্রয় দুই রূপকে আত্মীকৃত করে শ্রীচৈতন্যরূপে আবির্ভূত হয়েছেন। রাধাভাবে ভাবিত হয়ে রাধার ভাবমূর্ত্তি নিয়ে তিনি কৃষ্ণ অন্বেষণ করেছেন। আবার অন্তরে কৃষ্ণ হয়ে শ্রীরাধার গভীর প্রেমার্তির আত্মাদান করেছেন। এই গৌরাঙ্গ একই সাথে রাধা-কৃষ্ণের যুগ্ম সত্তার জীবন্ত বিগ্রহ রূপে আবির্ভূত হয়েছেন।

এই প্রসঙ্গে চৈতন্যের অন্তরঙ্গ পরিকর বাসুদেব ঘোষের পদ উদ্ধৃত করা যেতে পারে —

“যদি গৌরাঙ্গ নহিত কি মেনে হৈত  
কেমনে ধরিত দে।

রাধার মহিমা প্রেমরস সীমা  
জগতে জানাত কে।।”

‘চৈতন্যচরিতামৃত’কার কবিরাজ গোস্বামী লিখেছেন —

“রাধাকৃষ্ণ এক আত্মা দুই দেহ ধরি।  
অন্যোন্মো বিলসে রস আত্মাদান করি।।  
সেই দুই এক এবে চৈতন্য গোসাঞি।  
রস আত্মাদিতে দৌহে হৈল এক ঠাই।।”

চার. সহজিয়া বৈষ্ণব মতে রাধা-কৃষ্ণ ভাবনা ও সাধনা

গৌড়ীয় বৈষ্ণব ধর্ম ও দর্শনের আলোচনার পর সেই প্রেক্ষিতে সহজিয়া বৈষ্ণব ধর্ম ভাবনা ও সাধনার সংক্ষিপ্ত পরিচয় নিয়ে আমরা গৌড়ীয় বৈষ্ণব ভাবনার সঙ্গে এর পার্থক্যটি এবং সেই সঙ্গে গৌড়ীয় বৈষ্ণব দর্শনের থেকে এর বিচ্যুতির স্বরূপটি বুঝে নিতে চাই।

চৈতন্যোত্তর যুগে, বিশেষতঃ খ্রীষ্টীয় সপ্তদশ-অষ্টাদশ শতাব্দীতে, গৌড়ীয় বৈষ্ণবধর্ম ও দর্শনের পরতন্ত্র অর্থাৎ রাধাকৃষ্ণ-তন্ত্র এবং গৌরতন্ত্র, লৌকিক জীবনাচরণভিত্তিক ও গৃহপন্থী ‘সহজ সাধনা’র সংস্পর্শে সম্পূর্ণ ভিন্ন এক রূপ ধারণ করে। পূর্বভারতে বৌদ্ধ মহাযানী সহজসাধনা, তন্ত্রসাধনা, নাথপন্থা ও যোগসাধনার মধ্য দিয়ে একটি দেহবাদী সাধনার ধারা জনমানসের অধিচৈতনে দীর্ঘকাল ধরে বিদ্যমান ছিল। তারই উত্তরাধিকার